

Dagangan borong, runcit melonjak kepada RM142.6 bilion

Perdagangan borong dan runcit Malaysia pada November 2023 meningkat 6.2 peratus kepada RM142.6 bilion berbanding bulan sama tahun sebelumnya, demikian menurut Jabatan Perangkaan Malaysia (DOSM).

Bagi perbandingan bulanan, nilai jualan kembali positif dengan peningkatan marginal 0.2 peratus berbanding Oktober 2023.

Ketua Perangkawan Malaysia, Datuk Seri Dr Mohd Uzir Mahidin, berkata peningkatan tahunan pada November itu dipacu oleh subsektor perdagangan borong yang meningkat 6.2 peratus atau RM3.7 bilion kepada RM63.2 bilion.

Beliau berkata, perdagangan runcit juga berkembang dengan mencatatkan 4.4 peratus atau RM2.6 bilion kepada RM61.3 bilion, diikuti oleh kenderaan bermotor dengan pertumbuhan dua angka 12.7 peratus atau RM2 bilion untuk berada pada RM18.1 bilion.

Melihat kepada prestasi mengikut subsektor, Mohd Uzir memaklumkan bahawa pertumbuhan 6.2 peratus tahun ke tahun bagi perdagangan borong didorong oleh lain-lain pengkhususan jualan borong yang meningkat RM2.1 bilion atau 9.3 peratus kepada RM24.2 bilion.

Katanya, ini diikuti oleh jualan borong barangan isi rumah (5.2 peratus), jual borong bahan mentah pertanian dan haiwan hidup (9.5 peratus), jualan borong makanan, minuman dan tembakau (2.3 peratus), jualan borong jentera, peralatan dan bekalan (2.6 peratus), perdagangan borong tanpa pengkhususan (3.3 peratus) dan jual borong berdasarkan kontrak atau yuran (4.1 peratus).

“Walau bagaimanapun, bagi perbandingan bulanan, perdagangan borong menyusut 0.2 peratus, terutama disebabkan oleh lain-lain pengkhususan jualan borong (-1.1 peratus), jualan borong barangan isi rumah (-1.5 peratus) dan jual borong bahan mentah pertanian & haiwan Hidup (-1.1 peratus),” katanya.

Mengulas lanjut mengenai subsektor perdagangan runcit, Mohd Uzir berkata kenaikan 4.4 peratus tahun ke tahun pada bulan yang dikaji itu disokong oleh jualan runcit di kedai bukan pengkhususan yang tumbuh 6.5 peratus atau RM1.4 bilion kepada RM23.4 bilion.